

**PRU-13 Boleh Diadakan Tanpa Keputusan Jawatankuasa Khas Parlimen - Najib**  
**mStar Online**  
**Ogos 20, 2011**  
**Oleh ARIFFUDDIN ISHAK**

**KUALA LUMPUR:** Pilihan Raya Umum ke-13 (PRU-13) boleh diadakan pada bila-bila masa tanpa terikat kepada laporan yang akan dikeluarkan oleh Jawatankuasa Khas Terpilih Parlimen berhubung penambahbaikan sistem pilihan raya.

Perdana Menteri, Datuk Seri Mohd Najib Tun Razak berkata, kerajaan tidak semestinya menunggu hasil laporan jawatankuasa khas berkenaan siap sepenuhnya untuk membubarkan Parlimen bagi membolehkan pilihan raya diadakan.

"Pilihan raya boleh diadakan pada bila-bila masa, tak ada kaitan dengan Jawatankuasa Khas Parlimen.

"Tak terikat...tak terikat, boleh bila-bila masa," katanya pada sidangb media selepas mempengerusi mesyuarat Majlis Tertinggi (MT) Umno di sini, Jumaat.

Berhubung sama ada kerajaan mempunyai masa yang cukup untuk melakukan reformasi terhadap sistem pilihan umum sebelum penggal Parlimen berakhir pada 2013, Najib berkata ia terpulang kepada bentuk cadangan yang akan dikemukakan oleh jawatankuasa khas tersebut.

"Sudah pasti kita akan ambil masa (laksanakan). Kalau ada sesuatu yang kita boleh buat secara segera..kita buat segera," katanya.

Isnin lalu Najib mengumumkan pembentukan satu jawatankuasa khas yangdianggotai wakil kerajaan Barisan Nasional (BN), pembangkang dan bebasuntuk membincangkan reformasi pilihan raya.

Jawatankuasa khas berkenaan akan dianggotai oleh sembilan ahli Parlimen dengan lima daripadanya mewakili BN, pembangkang (3) dan bebas (1).

Sementara itu, mengulas mengenai kenyataan pembangkang bahawa mereka belum membuat keputusan sama ada akan menyertai jawatankuasa khas berkenaan, Najib berkata: "Ini adalah tawaran ikhlas pihak kerajaan untuk membincangkan perkara ini.

"Kita harap berlakunya konsensus atas apa penambah baikan yang akan kita lakukan," katanya.

Berhubung permintaan pembangkang agar mereka diberi tanggungjawab mengetuai jawatankuasa khas itu, Najib berkata menerusi amalan sistem Parlimen di Malaysia sesuatu jawatankuasa khas di bawah Parlimen akan diketuai oleh parti yang menguasai majoriti kerusi.

"Parti majoritilah yang akan ketua, ini sudah menjadi amalan dan prinsipselama ini," katanya.